



**ՀԱՅԱՍՏԱՆԻ ԶԱՆԳՎԱԾԱՅԻՆ ԼՐԱՏՎՈՒԹՅԱՆ ՄԻՋՈՑՆԵՐԻ ԷԹԻԿԱՅԻ
ԴԻՏՈՐԴ ՄԱՐՄԻՆ**

Հայաստանի Հանրապետություն, 0002 Երեւան, Ղազար Փարպեցի, 9բ
հեռ.՝ + 374 10 53 00 67, էլ. փոստ՝ meo@ypc.am

Դիտորդ մարմնի կազմը

- Դավիթ ԱԼԱՎԵՐԴՅԱՆ
- Նարինե ԱՎԵՏԻՍՅԱՆ
- Ռուբեն ԲԱԲԱՅԱՆ
- Սուրեն ԴԵՂԵՐՅԱՆ
- Արսեն ԽԱՌԱՏՅԱՆ
- Արա ՂԱԶԱՐՅԱՆ
- Աշոտ ՄԵԼԻՔՅԱՆ
- Մարգարիտա ՄԻՆԱՍՅԱՆ
- Գնել ՆԱԼԲԱՆԴՅԱՆ
- Բորիս ՆԱՎԱՍՍԱՐԴՅԱՆ
- Արա ՇԻՐԻՆՅԱՆ
- Արեւիկ ՍԱՀԱԿՅԱՆ
- Նունե ՍԱՐԳՍՅԱՆ
- Վիգեն ՍԱՐԳՍՅԱՆ
- Անժելա ՍՏԵՓԱՆՅԱՆ

**ՀԱՅԱՍՏԱՆԻ ԶԼՄ-ՆԵՐԻ ԷԹԻԿԱՅԻ ԴԻՏՈՐԴ ՄԱՐՄԻՆԻ
ՓՈՐՁԱԳԻՏԱԿԱՆ ԿԱՐԾԻՔԸ**

Լրագրող Լիա Մարգարյանի՝ «Իրավապահները վերծանել են Ախտոյանի եղբոր կնոջ հեռախոսի հաղորդագրությունները» վերտառությամբ ֆեյսբուքյան գրառումն եւ լրատվամիջոցներում դրա արտատպումների վերաբերյալ Դավիթ Ախտոյանից ստացված բողոքի կապակցությամբ

Ա. ՓԱՍՏԵՐ

1. 2025թ. հոկտեմբերի 8-ին Հայաստանի ԶԼՄ-ների էթիկայի Դիտորդ մարմին է դիմել քաղաքացի Դավիթ Ախտոյանը՝ բողոքելով «Իրավապահները վերծանել են Ախտոյանի եղբոր կնոջ հեռախոսի հաղորդագրությունները» վերտառությամբ [նյութի](#) դեմ: Ըստ դիմումատուի՝ նյութում առկա տեղեկությունները չեն համապատասխանում իրականությանը, վիրավորում են իր եւ իր ընտանիքի արժանապատվությունը:
2. Դիմումատուի վիճարկած նյութը, ըստ էության, լրագրող Լիա Մարգարյանի ֆեյսբուքյան գրառումն է, որով նա, հղում անելով իրավապահ համակարգում իր աղբյուրներին, Փարաքար համայնքում վերջին շաբաթներին ստեղծված իրավիճակին առնչվող տեղեկություններ է հրապարակել, որոնցում մասնավորապես առկա են որոշ մարդկանց անձնական կյանքին վերաբերող վարկաբեկող տեղեկություններ: Նյութը արտատպվել է մի շարք լրատվամիջոցների կայքերում (մասնավորապես՝ mamul.am, aravot.am, aysor.am, pastinfo.am, asekose.am):
3. Ստանալով դիմումը՝ Դիտորդ մարմնի համակարգողը կապվել է Լիա Մարգարյանի հետ եւ տեղեկացել, որ վերջինս խնդրո առարկա ֆեյսբուքյան գրառումն արել է որպես լրագրող եւ թողարկման նախապատրաստական փուլում գտնվող «Իշխանություն» լրատվամիջոցի ներկայացուցիչ:

Բ. ԻՐԱՎԱԿԱՆ ԵՎ ԷԹԻԿԱԿԱՆ ՆՈՐՄԵՐ

I. Հայաստանի լրատվամիջոցների եւ լրագրողների էթիկայի կանոնագիր

... խմբագրությունն ու լրագրողը պարտավոր են՝

1.1. Մինչեւ հրապարակումը ստուգել ցանկացած աղբյուրից ստացված տեղեկությունների հավաստիությունը, չկոծկել եւ չխեղաթյուրել փաստերը, չհրապարակել ակնհայտ կեղծ տեղեկություններ:

1.3. Պատասխանատու մոտեցում ցուցաբերել սոցցանցային կամ նոր մեդիա հարթակների տեղեկությունները տարածելիս, անպայման նշել դրանց ստուգված, վստահելի կամ հետագա ստուգման ենթակա լինելը:

1.5. Վերլուծություններ եւ մեկնաբանություններ կատարելիս հիմնվել ստույգ փաստերի եւ հավաստի տեղեկությունների վրա:

4.1. Պաշտպանել մարդկանց մասնավոր կյանքի անձեռնմխելիության իրավունքը, ներառյալ՝ հարզանքն անձնական եւ ընտանեկան կյանքի, բնակարանի, սեփականության, առողջության եւ նամակագրության նկատմամբ: Միայն հասարակական շահի առկայությամբ կամ պաշտպանության անհրաժեշտությամբ կարող է արդարացվել բարձրաստիճան պաշտոնատար անձանց, հասարակական գործիչների, իշխանության կամ հասարակական ուշադրության ձգտող մարդկանց անձնական կյանքին վերաբերող տեղեկությունների հրապարակումը:

6.2. Պատրաստակամ լինել հանդիպելու այն անձանց կամ կազմակերպությունների ներկայացուցիչներին, որոնք իրենց վիրավորված կամ զրպարտված են համարում կոնկրետ հրապարակմամբ, եւ պատասխանի հնարավորություն ընձեռել բոլոր նրանց, որոնց հասցեին քննադատություն կամ մեղադրանքներ են եղել հրապարակումներում:

Գ. ՓՈՐՁԱԳԻՏԱԿԱՆ ԿԱՐԾԻՔ

Հայաստանի ԶԼՄ-ների էթիկայի Դիտորդ մարմինը, **հաշվի առնելով, որ**

- Լիա Սարգսյանն իր ֆեյսբուքյան գրառումը կատարել է որպես լրագրող եւ ներկայանում է որպես լրատվամիջոցի ներկայացուցիչ,
- մի շարք լրատվական կայքեր վերահրապարակել են գրառումը՝ առանց փոփոխության կամ սեփական վերլուծություններով եւ մեկնաբանություններով,

քննության է առել Դավիթ Ախտոյանի բողոքը եւ,
ուսումնասիրելով խնդրո առարկա նյութը, **արձանագրում է.**

1. «Իրավապահները վերծանել են Ախտոյանի եղբոր կնոջ հեռախոսի հաղորդագրությունները» վերտառությամբ հրապարակումը հակասության մեջ է մտնում Հայաստանի լրագրողների եւ լրատվամիջոցների էթիկական սկզբունքների Կանոնագրի մի շարք կետերի հետ: Մասնավորապես.

ա) Լրագրողը/լրատվամիջոցը մինչեւ հրապարակումը չի ստուգել իր աղբյուրից ստացված տեղեկությունների հավաստիությունը: Համենայնդեպս, նյութում դրա վերաբերյալ որեւէ նշում չկա: Այս իմաստով՝ նյութի հրապարակումը հակասության մեջ է մտնում Կանոնագրի 1.1 կետի հետ:

բ) Մի շարք լրատվամիջոցներ իրենց կայքերում տեղադրել են Լիա Սարգսյանի տարածած տեղեկությունները՝ առանց ստուգելու դրանց վստահելի կամ հետագա ստուգման ենթակա լինելը, ինչը հակասության մեջ է մտնում Կանոնագրի 1.3 կետի հետ:

գ) Որոշ լրատվամիջոցներ, անդրադառնալով թեմային, վերլուծություններ եւ մեկնաբանություններ են կատարել Լիա Սարգսյանի արած հրապարակման հիման վրա, ինչը հակասության մեջ է մտնում Կանոնագրի 1.5 կետի հետ:

դ) Խնդրո առարկա հրապարակման մեջ առկա են նույնականացվող քաղաքացիների անձնական կյանքին, արժանապատվությանը վերաբերող եւ համբավը արատավորող տեղեկություններ: Այս իմաստով, նյութի տարածումը հակասության մեջ է մտնում Կանոնագրի 4.1 կետի հետ, այն է՝ խմբագրություններն ու լրագրողները պարտավոր են պաշտպանել մարդկանց մասնավոր կյանքի անձեռնմխելիության իրավունքը, ներառյալ՝ հարգանքն անձնական եւ ընտանեկան կյանքի, բնակարանի, սեփականության, առողջության եւ նամակագրության նկատմամբ:

ե) Նյութի հեղինակը պատասխանի հնարավորություն չի տվել այն անձին (անձանց), որոնց վերաբերյալ վարկաբեկիչ տեղեկություններ է հրապարակել: Այս իմաստով՝ հրապարակումը հակասության մեջ է մտնում Կանոնագրի 6.2 կետի հետ:

2. Դիտորդ մարմինը մտահոգությամբ արձանագրում է, որ ինչպես այս, այնպես էլ մասնագիտական էթիկայի էական խախտումներ

պարունակող մի քանի այլ աղմկալի հրապարակումներում հղումներ են կատարվել իրավապահ մարմիններից ստացված տեղեկությունների վրա: Առանց գնահատելու՝ արդյոք տվյալ դեպքում իրավապահներից «արտահոսքը» իրականում եղել է թե ոչ, Դիտորդ մարմինը համարում է, որ նման եղանակով ստացված տեղեկությունները չեն արդարացնում լրագրողների կողմից անձանց մասնավոր կյանքի մասին վարկաբեկիչ տվյալների տարածումը, եւ հորդորում է զգուշավորությամբ, նրբանկատությամբ ու պատասխանատվությամբ վերաբերվել արտահոսքերի օգտագործմանը:

3. Դիտորդ մարմինը կոչ է անում նյութը տարածած լրատվամիջոցներին, անկախ ինքնակարգավորման նախաձեռնությանը միացած լինելու կամ չլինելու հանգամանքից, սույն Կարծիքը տարածել իրենց հարթակներում:

**Ընդունվել է 2025 թ. հոկտեմբերի 22-ին,
ԶԼՄ-ների էթիկայի Դիտորդ մարմնի հետևյալ կազմով**

Գնել ՆԱԼԲԱՆԴՅԱՆ
«Նյումեզ» հրատարակչության գլխավոր խմբագիր
Բորիս ՆԱՎԱՍԱՐԴՅԱՆ
Երեւանի մամուլի ակումբի պատվավոր նախագահ
Դավիթ ԱԼԱՎԵՐԴՅԱՆ
«Մեդիամաքս» լրատվական գործակալության գլխավոր խմբագիր
Վիգեն ՍԱՐԳՍՅԱՆ
ԵՄԱ մասնագիտական էթիկայի հանձնաժողովի նախագահ
Մարգարիտա ՄԻՆԱՍՅԱՆ
«Ցայգ» հեռուստաընկերության տնօրեն
Արսեն ԽԱՌԱՏՅԱՆ
«Ալիք Մեդիա» լրատվական-վերլուծական կայքի հիմնադիր
Արեւիկ ՍԱՀԱԿՅԱՆ
Factor TV-ի գործադիր տնօրեն
Սուրեն ԴԵՉԵՐՅԱՆ
Ampop.am-ի հիմնադիր խմբագիր
Աշոտ ՄԵԼԻՔՅԱՆ
Խոսքի ազատության պաշտպանության կոմիտեի նախագահ
Նարինե ԱՎԵՏԻՍՅԱՆ
Վանաձորի «Լոռի» ՀՀ գործադիր տնօրեն

*[ԶԼՄ-ների էթիկայի Դիտորդ մարմինը](#) ձեւավորել են
Ինքնակարգավորման նախաձեռնությանը միացած լրատվամիջոցները,
որոնք այս պահին 95-ն են: ԴՄ-ն ղեկավարվում է Հայաստանի
լրատվամիջոցների եւ լրագրողների էթիկական սկզբունքների
Կանոնագրով, որն ընդունվել է 2007 թվականի մարտի 10-
ին, վերախմբագրվել՝ ինքնակարգավորման նախաձեռնության
համաժողովում, 2024 թվականի մայիսի 18-ին:*